



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7 Yangia anidakangma : Tir Yimym

tiryimym@aolima

tir yimym

TAPAK 3

Taküm July ita tashi nung Finland, Sweden NATO nung züngoktsü; Finnish tir

Turkey nung India nunger mekümzükteti aliba osang mali: Virander Paul



VOL. XX NO. 121 (ADOK 121) DIMAPUR AMUNGNÜ (SUNDAY)

TSÜKLAI (FEBRUARY) 12, 2023

₹ 5.00

Kazheto Kinimi: 14 buba NLA nung mezüngbuba MLA



Kazheto Kinimi (Twitter)

tenzüksü aser onoki NDPP den menden 40: 20 lemsatepa lir, anungji onoki tanüingba menden 19 nung temulung agütsütsü" ta ashi.

"Onoki külem yariteper teloktem den tangatetep ka agia lir, telok tila mesüra tulu ta kecha mali, onok ya tangatetba ka aliba teyariteperem lir aser ibaji terenlok talila bener arua Nagaland nung alirtemtenzüksü atema lir" ta Nalin Kholi-i ashi.

Nagaland nung alirtemi teloktep sorkar moatsütsü aser taruba sorkar akümtsü maongka agütsütsü ta amanger. Iba ajanga double engine sorkar indang mapa tajung maneni inyaka aotsü, ta paisa ashi.

Prime Minister Narendra Modi, Union Home Minister Amit Shah aser BJP national president JP Nadda nungeri anir lennir aikati Nagaland semdangtsü aser party candidate tem asoshi nüboyimstütsü, ta paisa shisem.

Tanü BJP-i taoba MLA Khehaho Assumi party nung pelashishia agizük.

Dimapur, February 11, 2023 (TYO): Nagaland nung 31 Akuluto assembly constituency nungi Bharatiya Janata Party (BJP) candidate Kazheto Kinimi den tetokteper mali ser 14 buba NLA nung mezüngbuba MLA kümogo.

Kazheto den tokteptsü atema nomination file asür Khekashe Sumi-i pa tenüing meyipa agiba ajanga pai takok angu.

Honibarnü Niathu Resort nung BJP national spokesperson Nalin Kholi-i osangbener den jembidang "chichiba election maparen

BJP Tuensang-i Khristan ken ka tensaba atema tatok meshir

Dimapur, February 11, 2023 (TYO): Nagaland kübok 53 Tuensang Sardar I Assembly Constituency nungi Bharatiya Janata Party (BJP)-i election nüboyimba sentong ka nung nüngtugu Khristan ken ka amshiba atema tatok meshiogo.

February 6 nü BJP züngsemtemi Khristan kensü nung kenjang melenshia atenba video ka social media nung kanga prokshi aser Nagaland

nung senso aikati ashishitep. Iba tatalokba sülen BJP-i sangdong ka ajanga public dang tatok meshiogo.

Iba inyakyim ajanga Khristan tamangertem temulung yirutsüogo aser iba atema kanga sasar, aaka bilemer aser mepelar ta 53 Tuensang Sardar I constituency BJP media cell sangdong nung shia lir.

"Iba ya asen Kümtetdakba

Yisu mesüra tamangba yimsü sensamasatsü tebilemba nung atenba masü. Ozü züngsemtemi mangatetba aser memetetba ajanga iba ashishitep ken o adokogo aser Tsüngrem dang tatok meshir"

ta BJP media cell-isa ashi.

Iba tatalokba ajanga asen tamang akangshiogo aser Naga nungeri tarutsü nung tali kümdangshitsü sayuogo ta parnokisa ashi.

Küm 5 tsüngda CM Rio Rs 10.54 crore agi takarba kümogo

Dimapur, February 11, 2023 (Agencies): Küm pungu tsüngda Chief Minister Neiphiu Rio indang rongsen Rs 10.54 crore agi teimba kümogo.

February 27, 2023 nü Nagaland assembly election atema nomination papers agütsüba nung iba osang shia lir. CM Rio-i Rs 15.99 crore alanga movable assets aser Rs 30.96 crore alang immovable assets lir ta affidavit nung shia lir. 2018 nung pai pa indang rongsen ajak agi

Rs 36.41 crore ta shia liasü aser iba nung ajemdaker küm pungu tsüngda pa Rs 10.54 crore agi takarba kümogo.

Külen, Nagaland BJP president aser Alongtaki constituency nungi BJP candidate Temjen Imna Along-i pa indang rongsen ajak agi Rs 10.06 crore ta shiogo.

Pa ket nung Rs 1.47 crore alang movable assets aser Rs 8.59 crore alang immovable assets lir ta affidavit nung shia lir.

Maneni Deputy Chief Minister aser Tyui nung BJP candidate Y Patton-ia pa indang rongsen ajak agi Rs 2.85 crore lir ta shia lir. Pa ket nung Rs 60.24 lakh alang movable assets aser Rs 2.25 crore alang immovable assets lir ta affidavit nung shia lir.

Taoba Nagaland Chief Minister aser Peren constituency nungi NDPP candidate TR Zeliang-ia pa indang rongsen ajak agi 7.37 crore ta metetdaksüogo.

NATIONALIST DEMOCRATIC PROGRESSIVE PARTY (NDPP)

Facta non Verba

NDPP SUPPORTS

CLEAN ELECTION

YOUR VALUABLE VOTE IS YOUR FUNDAMENTAL RIGHT



NAGALAND - TOWARDS A STATE OF EXCELLENCE



PUBLISHED BY : NDPP MEDIA & COMMUNICATION COMMITTEE.

FOLLOW US @NDPPOFFICIAL

" Na lenir makümdangbo takok ajakji ne terenlok asoshi, kodang na lenir kümdir takok ajakji tangar renloktsü asoshi " Jack Welch

- Ungma Baptist Arogo Laishir Telongjem Clean Election Tayongzükba

Mkg nung 2nd & 3rd Polling officer training agi



Mayangnokcha Government Higher Secondary School, Mokochung nung February 11, 2023 nü polling personnel nem round tanabuba training agütsü dang EAC Vitolu-i jembiba noksa nung angur.

Dimapur, Tsüklai/February 11 (TYO): Nagaland Legislative Assembly 2023 atema aruya aliba General Election asoshi Mokochung district kübok 2nd & 3rd Polling officers nem training round tanbuba February 11,

2023 nü Mayangnokcha Government Higher Secondary School nung agia liasü. Election Commission of India nungi General Election Observer, Kamal Kant Saroch IAS ajanga training agiba

tesem semdanga Master Trainer aser training agirtem den sensaksem kaa liasü.

Iba mapang pai training agidang EVM amshitsü junga angazüka polling day nung pei mapa tajungtiba nung inyaksü ajungshia liasü.

Mkg. nung election dak sentakba nung shisa lemsatep sentong agi

Mokokchung, Tsüklai/February 11 (TYO) Mokochung DC office nung February 10 nü 27th Mokochung Town A/C aser 28 Koridang A/C nung Candidates, candidate agents/ candidates representatives pur election shisa lemsatepba sentong ka agiogo.

Iba sentong nung General

Election Observer Alka Srivastava IAS ajanga Candidates, candidate agents/ candidates representatives-temi Model Code of Conduct aser election dak sentakba tetuyuba nung timi anidaksü metetdaksü.

Kasa sentong nung sentong lenir SDO Civil and Returning Officer Shelley Katiry -i political parties/agents/

representatives nungertem dang election sünepa agitsü asoshi pei constituency nung inyaksülata ashi.

SDO Civil and Returning Officer-isa village council mesüra telok shir südir süaka candidate ka alakteta meyonga inyakra temzüng nung aliba ama tapet temerenshi alitsüta metetdakja ashi.

Election Observer ajanga candidate indang Account Register reprangtsü

Dimapur, Tsüklai/February 11 (TYO): Dimapur atema Election Commission of India ajanga yokba Election Observer, Suboth Singh den 1-Dimapur I, 2-Dimapur II aser 3-Dimapur III Assembly Constituencies tem indang

R.Os temi tsünglanglen agüja aliba ama inspection agitsü: 1.14/2/23 at 11:00 A.M DC's Office, Dimapur 2.20/2/23 at 11:00 A.M DC's Office, Dimapur 3.24/2/23 at 11:00 A.M DC's Office Dimapur.

Iba dak sendakba nung 1-

Dimapur I, 2-Dimapur II aser 3- Dimapur III Assembly Constituencies kübok candidates ajungai parnok indokba Day to Day Accounts of Expenditure reprangtsü atema EO aser Returning Officers dang sayutsü metetdaksü.

Kohima nung Election Expenditure atema training agütsü



AEOs aser political agents balala den February 11, 2023 nü Deputy Commissioner, Kohima indang Conference Hall nung training agütsü dang tangokba noksa ka nung Expenditure Observers, Samatha Mullamudi aser Shyam Kumar nung angur.

Dimapur, Tsüklai/February 11 (TYO): Candidates/election agent temi Election Expenditure indang account tem anepaluyim asoshi training ka February 11, 2023 nü Deputy Commissioner, Kohima indang Conference Hall nung agüja liasü.

Training agirtem den jembidang 10 Northern Angami-I A/C aser ADC Kohima atema RO, Rhosiethe Ngouri-i parnok dang election maparen takok ngua inyaktetsü asoshi team ka ama lungjemer inyaksü mepishi aser iba maparen ajunga nung teyaritep aser amalitep alitsü ayongzüka liasü.

AEO Lian-i 'Day to day accounts Register, Annexure-

E1(Part A)' indang PowerPoint agütsü, AEO Santosh ajanga Cash Register for maintenance of day to day accounts Annexure-E1 (Part B) indang PowerPoint agütsü aser AEO Sokenye Tep-i Bank Register for maintenance of day to day accounts Annexure-E1 (Part C) onük nung PowerPoint agüja liasü.

AEO Lovejoy Thanjom ajanga Schedule 1-4 of Annexure E2; AEO T. Thangou ajanga Schedule 5-8 of Annexure E2; AEO Andy ajanga Schedule 9-11 of Annexure E2 aser AEO Kyochamo ajanga Part I to IV of Annexure E2 indang PowerPoint agüja liasü.

Expenditure Observer, Shyam Kumar ajanga Inspection on Accounts indang jembiba aser Question and Answer session agi. Iba sülen onük shia shisadokden senden ka Expenditure Observer, Samatha Mullamudi-i anir agia liasü aser Olivi Thurr, Asst. Election Officer, Kohima ajanga melezüng o jembia liasü.

Iba training sentong nung menden Nodal Officer, EEM Bokato Hesso liasü aser 'Monitoring of Expenditure registration for maintenance of day to day Accounts of Election Expenditure by contesting candidates' indang Handbook lema agüja liasü.

Temsü Longchar den asüpila sentep

Kohima, Feb.11 (TYO) : Nagaland Sericulture department nung mezüng Director Wb.Temsü Longchar February 11, 2023 nü alima nungi pilaogo. Pa ya Nagaland nungi mezüng PH.D Sericulture liasü. Pai pa temeim kinungtsü Wt.Asenla Temsü Longchar den par chir asem

aser parnok apuani den semchir 7 toktsür teti tatem maka tesünep nung kibuba den alitsü ogo.

Pa den asüpila sentep sentong par kidang Lower Forest Colony, Kohima nung February 12, 2023 amongnü nikongdang 1:30 ako nung alitsü renema lir.

Central Bureau of Communication ajanga SVEEP Workshop ayongzüka

Dimapur, Tsüklai/February 11 (TYO): Central Bureau of Communication, Field Office Kohima, Ministry of Information & Broadcasting, Government of India ajanga Chief Electoral Officer Nagaland den lungjemer Systematic Voters' Education and Electoral Participation (SVEEP) indang Orientation Workshop ka February 11, 2023 nü Eastgate Hotel, Midland Kohima nung ayongzüka liasü.

Iba sentong nung tesemdang tongti ka ama jembidang Deputy Commissioner aser District Election Officer Kohima, Shanavas C ajanga ashiba agi, election timi aser müreka agitsü atema Election Commission of India indang guidelines nung aliba ama democratic yimya nung election agitsüla.

Shanavas-i state nung aliba lanurtem dang system melentsü asoshi dangari rangloker/nükshia repranger ka-ka akumtsü ajungshia liasü.

Private Registered Troops (Parts) ajanga nübur asoshi temelenshi jenti bener arutsütet aser talisa election mapang tejakleni otetsüsa jenti inyaktetsü, ta pai ashi.

Election mapang tim masüba mapa inyakba melentsü mapang tongja tongogo, anungji lanurtem clean election asoshi osangbener ama alitsüla, ta Deputy Commissioner, Kohima ajanga ashi.

Yimtsüngtem nung clean election agitsü sangdongba aser pangzüng yangluba atema Shanavas-i pelaba lemsatepa liasü.

Tongti tesemdang ka ama iba sentong nung jembidang Chief Electoral Officer Nagaland, V Shashank Shekhar-i ashuba agi, Nagaland Legislative Assembly Election

agitsü hopta ana dang lir aser political party balala nungi nübuyimba maparen tenzüksü, anungji yimtsüng sasep nung densema vote agütsür temi clean election nungittsüla.

National level nung RK School Tuli ajanga takok tulu angu

Dimapur, Tsüklai/February 11 (TYO): Wipro Earthian Sustainability Education Program for Schools indang takok angur Top 20 National winner rongnung Rajeshwari Karuna School Tuli, Mokochung densema lir.

Biodiversity, Waste and Water Management omen nung linük nungi kaket reju 1200 dak tema nungi RK School Tuli ya shimteta liasü.

February 11, 2023 nü iba sempet ya Bengaluru nung Wipro Ltd. indang Executive Chairman, Rishad Premji aser

Azim Premji Foundation indang CEO, Anurag Behar nungeri agüja liasü, kong school nungi kaketshir pongu den tesayur ka aser Earthian Sustainability Educator dena liasü.

Wipro Earthian ya küm 11 jungogo aser iba foundation yagi school 13000 dak tema aser college 4000 dak tema awajema lir.

Kanga junga shisadanga inyakba nung Sustainability education ya angazükba yimya nung inoksema yimya melenshidaksütsü nükjidong nung iba sentong ya tenzüka lir.



February 11, 2023 nü New Delhi nung Central Board of RBI senden nung Union Finance Minister, Nirmala Sitharaman aser Reserve Bank of India (RBI) Governor, Shaktikanta Das na den ketdangsertem adenba noksa nung angur.

Turkey nung India nunger mekümzükteti aliba osang mali: Virander Paul

Ankara (Turkey), Tsüklai/February 11 (Agencies): Honibarnü Indian ambassador to Turkey, Virander Paul-i, menoknok lendong agi kongshiba Turkey linük nung India nunger mekümzükteti aliba osang mali, ta metetdaksü.

Paul-i, "Turkey nung India nunger 3,000 lir. Parnok teimbaka menoknok agi kongshiba tesemtem nung malir aser aika aienshiogo. Onoki parnok den tongtepratepdar. Tang tashi nungbo India nunger shinga mekümzükteti aliba osang mali," ta metetdaksü.

"Hatay province nung Indian Army temi field hospital ka amenokogo. C-17 tayimtsü ana nung medical team anir arua yipten 30 aliba hospital amenoker," ta pai metetdaksü. "Turkey nung tensa mejungi lir aser India-i lendong agi kongshiba nüburtem nungdak balala nung yariteper. Anogo shia nungdak balala adoker," ta pai metetdaksü.

Hokolbarnü India nungi National Disaster Response Force (NDRF)-i Turkish Army den yaritepa arrshi küm 8 tetsür chanu ka kümzüka liasü. Tetsür chanulaji Turkey kübok

Gaziantep nung ki chirepba jana agi nembanger lia kümzü. "Meranga inyakba ajanga takok angur; NDRF team-i Turkish Army den yaritepa takoksa angur ka (küm 8 tetsür ka) @1545 ako nung Bahceli Evler Mahallesi, Nurdagi, Gaziantep, Turkiye nung kümzü.," ta NDRF-i twitter ajanga metetdaksü.

Honibarnü osang ka ajanga ashiba agi, ki chirepba jana nungi Hokolbarnüa tanur aika kümzüka liasü aser tang tashi nung Turkey-Syria menoknok lendong nung asür 24,000 jungogo.

Sorkari vote angutsü nükjidong nung UCC benokner: JUH

New Delhi, February 11 (Agencies): Jamiat Ulama-i-Hind (JUH) senden nung Uniform Civil Code (UCC), Islamophobia (Muslim nunger tsübuba/sempapa), Madrassa aser personal law densema onük aika nung o lemtepa sülen bangzüng aika renemogo.

JUH bangzüng ajanga, "Tang aliba sorkari Uniform Civil Code benokba ajanga Muslim Personal Law agentsüner, aser iba ya vote angutsü atema inyakba politics lir. Iba denji külemi linük temzüng nung temeden balala kümzüksü atema meinyaker," ta metetdaksü.

Muslim nunger tongti tentet Jamiat Ulama-i-Hind 24buba lokti senden Hokolbarnü tenzüka liasü. JUH Tir, Maulana Mahmood Madani leniba nung anogo asemnü Jamiat senden

ya New Delhi nung aliba Ramlila ground nung ayongzü. JUH-i India linük nung Muslim nunger anema tesempa mapatong aser Islam yimsü amangertem tsübuba (Islamophobia) kanga bulua akümba onük densema onük aika nung parnoki bangzüng renemogo.

"Tawa-tanü linük nung Islam amangertem tsübuba aser Muslim nunger anema tesempa agi inyakba mapatem kanga bulua kümдар," ta Jamiat-i metetdaksü. "Kanga tesasatsü tebilemstü kaji- sorkari item ama tatalokba meteta liaka parnoki memetet ama sendoker," ta JUH-i tai tongloksü.

JUH-isa, tesempa prokertem aser tesempa prokba nung shilem agir media

anema temerenshi tulu alitsü, iba dak alia minorities anema inyaktsü ajungshirtem nem temerenshi agütsü atema ozüng temeja ka nungdak, ta metetdaksü.

Jamiat Ulama-i-Hind tongti, Mahmood Madani-i, "India ya asen linük. Iba linük ya Narendra Modi (Ato kilonser) aser Mohan Bhagwat (RSS tongti) na meyong ama iba linük ya kasa Mahmood meyong. Mahmood ya parnok dang nungi taoba masü, yamaji parnok-a Mahmood dang nungi taoba masü," ta metetdaksü.

Mahmood Madani-isa linük nung tesempa o jembiba kanga bulua akümba atema tebilemstü akaba lemsatapa liasü.

Jamiat-isa voter registration aser election nung akok tashi nütsüng teimbai shilem agitsü atema bangzüng renema liasü.

TEPELA TASOBA ANOGO



Wb.I.Tako Jamir (Yaongyimsen)

Temeim obala tanü arishi küm 75 ajungba anogo tashi, pa taküm tajung, tepela aser takok manung anir aruba temoatsütem ajak asoshi Tsüngrem tenüng asanger. Ano maneni Pa tenzüka wadang nung mapa tuluba inyaka otettsüa Tsüngremi obala nem anema aliba arishi talang moajangma.

"Happy Birthday, Oba & Obou !"

- Temeim jala jabaso aser semchirtem.

NDA sorkari Jammu & Kashmir nung kiralongra azüokteter: Amit Shah

Hyderabad, February 11 (Agencies): Centre nung BJP-i aniba sorkari küm ti yimsüsüa aruba mapang tashi nung Jammu & Kashmir nung kiralongra, North-East nung telungpur rara aser Left wing extremism (Maoists) rara kanga azüoktetero, ta Honibarnü Hyderabad nung Union Home Minister, Amit Shah-i metetdaksü.

Hyderabad nung aliba Sardar Vallabhbhai Patel National Police Academy (SVPNPA) nung Indian Police Service (IPS) 74buba batch probationers passing out parade sentong nung jembidang Shah-i, India sorkar agencies aser police senteper anogo ka kija nung Popular Front of India (PFI) ama orgaizations anema inyakteta liasü, ta metetdaksü.

"Tawa ozüng ajanga Popular Front of India (PFI) nokdangtetba ajanga asenoki alima dang takok anguba tatishitsü sayutetogo. Iba ya ajanga asenoki democracy tashi aittsü atema melungteter inyakba kuli sayur," ta pai metetdaksü.

Kiralongra khenyongi magizüktetba, kiralongra anema ozüngtem yangluba, agency balala tashi itdaksüba aser yimtenren tsütsülen nungi melungteter inyakba ajanga kiralongra dak sendakba tatalokbatem kanga ajema kümogo, ta pai ashi.

Passing out parade nung IPS officer trainees 166 aser bendanger officer trainees 29 densema officer trainees 195-i Dikshant Parade nung shilem agia liasü.

RJD aser JMM na longjemer Lok Sabha election nung tokteptsü

Ranchi, February 11 (Agencies): Honibarnü RJD lenir aser Bihar deputy chief minister, Tejashwi Yadav-i, taruba Lok Sabha election nung Rashtriya Janata Dal (RJD) aser Jharkhand Mukti Morcha (JMM) nati longjemer tokteptsü, ta metetdaksü.

Tejashwi Yadav-i Jharkhand chief minister aser JMM lenir, Hemant Soren par kidang ajurua senden amenba sülen pai iba osang ya metetdaksü.

Osangbenertem den jembidang RJD lenir Yadav-i, "Tanü ni chief minister Hemant Soren ajurua tarutsü nung tayongzüka balala atema jembigo aser longjemer Lok Sabha election nunga tokteptsü atema jembia liasü," ta metetdaksü.

Yadav-i, "Onoki (RJD aser JMM) longjemer 2024 Lok Sabha elections nung tokteptsü. Jharkhand nung party-i inyakba mapatem asadangtsü atema ni yagi arutsü sentong yanglua liasü. Ajisüaka külenbo Lalu

Prasad (tebu) temang tamajungba akümba ajanga marutet. Lalu (tezüngjang) transplant takok ngua agiogo. Pa tanü kidangi arutsü (Singapore nungi Bihar-i arutsü). Bihar nung BJP sorkar nungi agienogo aser Mahagathbandhan teloktepi sorkar aküm. Item ajungaji ajanga ni Jharkhand mesemdangteti liasü," ta metetdaksü.

"Tang nungibo state semdangtsü aser sentong balala agitsü atema jungjunga asalentong yanglutsü. Jharkhand nung RJD indang organization tassen ka tentetogo. Onoki telemsa adokdaksürtem anema raratsü," ta pai metetdaksü.

Tejashwi-isa, RJD lenir Shyam Rajak-i JMM tongti aser taoba mapang chief minister Shibu Soren ajuruogo, ta metetdaksü.

February 9 nungi Shibu Soren, Ranchi nung aliba Medanta Hospital nung mongdar.



February 11, 2023 nü West Bengal kübok Malda nung Adivasi Sengel Abhiyan züngsemtemi Sarna Code takhangba agüja train lenmang mokdang longkak aitba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, TSÜKLAI (FEBRUARY) 12, 2022

Ozü kibongibo Kibubasa tenzüksü

Yihusua aser par kibong asoshi Yehovah Tsüngrem tenzüksübaji ozüng masü saka par mulungba nung shimtetsüba mapa ka liasü. Anungji Egypt nung alidang par tsüraburtemi külemba süngyanglu aser bendanger tsüngremtem tenzüksübaji pa mulung liasü. Aji oda, külem alir nübortemi külemba süngyanglu külema parnok tamangba yimsü aser libaliro den lirumedema aotsübajiang Yihusua asoshia temela liasü. Ajisüaka, Yihusuai par tebuo Abraham limapur asüba tia nungi Tsüngremi kümzüka aniteter külen Isak nungi Yakob aser Yakob nungi Israel nung kin 12 tashi küma rendaktsü aser Egypt nung ayawara nungia Yakob'er jabaso Yosef-iang parnok kümzüka aser Egypt lima nung Israel nung alar tia nungi kümzüksü asoshi Mosa aser Aron na yok aser tena leniba nung Tsüngremi parnok temerem tzüim aser Yordan ayong ajanga Kanaan lima tashi anir aruba, kasa Tsüngrem tashi aser taochi indangji metetba dang masü saka pai mamadok. Atangji, temerem tzüim ajanger külena Kanaan lima agitsü asoshi Israel nungertemi lenmang nung tsükchir aliba lima aser yimti aika ajuru saka parnok asoshi Tsüngremi tongpang raratsü, anungji tongpang tulu süaka melamelaa kokyonga ao. Ajisüaka, Kanaan lima tongerbo Israel nungertemi par tebuo Abraham, Isak aser Yakob Tsüngremi parnok dang aochiba mapatem amadok aser Tsüngrem teka agi temerem tzüim sadanger adoker aser Yeriko yimti talong dang along nung chirepdaktsürtem aser parnok chirnurtem to agi Yehovah Tsüngrem amadok. Parnoki mapang kabo, parnok Egypt nung alar liasü ta asüba otsü to amadok aser bendanger tsüngrem dangi meyip aser taküm Tsüngrem külemtsü melena süngyanglu külem. Ajisüaka, nübortem tia ajung, parnok tanishir Yihusuai parnok lenir Mosa ajanga Tsüngremi parnok alar tia nungi anitetba Kibuba Tsüngremji dang tsüngremtem madak Tsüngrem aser kiburtem madak Kibur ta par taküm, tanüla aser temulungjang ajak agi amang, anungji iba Yehovah Tsüngremi dang Israel nem takok aser temoatsü agütsütsü ta paibo amang. Iba tamang jagi Yihusuai par lima aser nübortem nem dang masü saka par kibong nema temoatsü aser tekümzüka agütsütsü ta angateta liasü. Ajisüaka, Yihusuai par nübortem dang kechisüdirsüaka pai amangba Kibuba Tsüngremjiang amangtsüla ta ozüngsa magütsü, saka pa arishi tatembang nung pai nübortem dang Tsüngremi Ur lima aser Egypt lima nungi aniteta tenangzüka lima tashi anir aruba Tsüngrem taochi otsü dang metetdaktsü. Tanü Yihusuai Israel nungertem dang akhi parnok alar tia nung aliba otsü ashiba amaji, asenoka asen tsüraburtem süng long külemba mapang, shiruru ama aliba tia nungi asenok nisung mesüka kümdakja anitetba tesüngmangtsü otsütem asenokia meteta lir. Ajisüaka, asenoki item tensa tia nungi asenok taküm aser tanüla kümzüka Tsüngrem temeim otsü ajak amadoker, tanübo Mosa aser Yihusua Tsüngrem masü saka alima rongsen aser ochimashi mapatem külemer. Asenok temanga mangsa aliba tia nungi Kibuba Yisu temeim ajanga mesamai kümzüker nung, Tsüngrem masü saka rongsen külemertemji asenok kümogo. Yimten nunga aser arogo nunga tenzükertem ajak Tsüngrem masü ita sen külemer kümogo. Aji oda, asen taküm mapa reprangdangra, asenoki Kibuba Yisu masü alima shi jangraba, ochimashi aser tashiyim tsüngremtem tenzükter. Iba ama mapang ka nung, asenoka shiba tenzüksü ? Ochimashilen nungi melamelaa takar kümdaktsüba tsüngrem tenzüksü asü ? Noah mapang nung ama, lembula melembula ta masü pei tenük dang ajung shima shima kibong kümdaktsüba tsüngrem külemtsü asü ? Tsüngrem tashi nung masü saka tashiyim agi takok ngudaktsüba tsüngrem külemtsü asü ? Aji asenok mulung. Ajisüaka, koba tia nung lidir liang aser telok tulubai koba tsüngrem külemdir külemang, Yihusuai Tsüngremi par nübor aser par kibong kümzüka indang mamai " ni aser ozü kibongbo onoki Kibubasa tenzüksü," ta Yihusua 24:15 nung shia aliba ama, asenokia asen mulungjang ajak agi asen tsüraburtem nem tekümtet agütsüba aser asenok kümzüksang Kibuba Yisu Khristasa tenzüksü ta shitetsüla. Atangji, iba jagi na aser nür kibong kümzüksü.

OLEMSABANG

AO KIN TEMENEN BUSHIA TEMULUNG MEMEYIPRA AIATAI TIAI AITSÜ

~ L.Kika Pongener.

(Yashi adok nungi...)

Asenoki asen jenjang masadanger dangashi, asen Aotsür Aor jenjang kangasa mejungi kümogo. Asenoki asen sasa tiak sanga Aor-ji 'Samanir' kin-a ta jembir dangashi, shitakba (Reality) nung asen jenjangji asadangra tangar kintem dang taaktsüka kümogo. Tesasatsüka, Dimapur aser Kohima ama jila nung Aotsür Aor meyong ki tulu tajung aika sentsüh-yong tangar kin nem agidaktsüogo. Sorkar mapatong nung tekolak menden nung amenertem reprangdangra Aotsür Aor aika mali kümadokogo. Linuk tenzükba mapatong nung reprangdangra tekolak menden nung Aotsür Aor-bo kata mali. Tanü Aotsür Aor Politician-tem reprangdangra tesuiba mapang asen lennirtemi Chief Minister menden nung mener Naga nung aniba ama anitsüsa, mesüra tangar kini temulung lemteta anidaktsüsa lennir tajung kata mali. Surabangla, asenok kechi ka nung ajemdaker tiak sanga o tulu-lu jembir...!!!??? Aotsür Aor shinga dak-a kati ka nem yimli agütsütepba shisatsü mali, pei ajung dang asaba shisatsü agi sunga lir. Ajak dak alaka, Aotsür Aor dak nukmerem aser mokokachi shisatsü keta aliba ya meintok tashi asenok tsüngda nung temeimtep aser telongjem makatsü. Iba ama shisatsü tamajung ya meintok tashi asen Ao kin rongnungi alima anitsüsa lennir tajung madoktsü. Atangji, Ao kin ya Tsüngremi atakadamba aser sentokba kin ka aküm asu ta aiben shisadanger. Tsüngrem o-i ashir, "Oh Israel kidong, nisung shia pei mapa yari ni nenok o bendangtsü ta Kibuba Tsüngremi ashir. Nenok meyipang, nenok sasa nenok ozüng raksaba nungi meyipang; angji tai menabaji nenok asoshi tesamatsü masütsü, kechi nungsa nenoki tai mena, nenok ozüng raksaba ajak nenok nungi endokadokang; aser nenok temulong tasen aser taküm tasen kümang" (Eze-18:30-31).

Anogo ishika sulen asenoki Election ajurutsü, aji oda, iba Election ya asen Naga nung küm-150 tashi amanga aruba Khristantem atema tamang tendangba mapang ka asutsü. Asenok ajaki metet, Election Commission temzüng-ozüng agi melaba agi Election nung Contest asutsü atema India nung senso shia temeden lir, aser vote agütsütsü atema-a India nung senso ka arishi küm-18 nungi tema ajaki pei mulungba 'Candidate' nem pei temeden vote agütsütsü temeden agüja lir. Aji oda, asenoki amangba Khristan yimsu tesayuba aser laishiba tesayuba nunga linuk temzüng-ozüng alema aibelena inyaktsübo sayua mali. Ajisüaka, Khristan yimsu mezüng agizükba Ao lima nung, Election Commission temzüng-ozüng anema tashiyim agi pei temeden inyaktsü memelar aser nokdang. Aji oda, mezüng Khristan yimsu agizükdak 'Mongchen' Ao lima nung linuk temzüng-ozüng anema aibelena tashiyim amshia meshitaki inyakbaji dang shitak aser linuk temzüng-ozüng agi melaba ama shitakba inyakbajibo aibelenba mapa ka amai kümdaktsüogo...!!! Tsüngrem o-i ashir, "Shirnoki tamajung dang tajung aser tajung dang tamajung ajar; shirnoki amang dang sangwa aser sangwa dang amang ama züngshir; shirnoki takü dang tanang aser tanang dang takü ama züngshir, parnok asoshi aiatai" (Isaia-5:20). Ajiser, iba ama metetsümonga aibelena inyakbaji jakdak-jakdaka nguaka, arogo nung tenzükertem iba ya Tsüngrem tsüngdang aibelener ta ashitsü melena mangu amai toktsür aser tesem kar kar nungbo arogo nung tenzükertema dena tongti shilem agia inyaker...!!! Anungji asen Ao kini item tai temenen ya küküa lumia sarasadema menangzükra, Tsüngrem lartem anir nutsüng nubur ajak Tsüngrem tsüngdang sentsüh aser khuret tulu asutsü.

Israel kin-i chuba nungi shir alar tashi anemsa abener küküa lumia temenen nangzüka Tsüngrem dang sarasadem, yongji Tsüngremi parnok dang tai atokba asenoki laishiba nung angur. Israelpurtemi par tsüraburtem temenen nangzüker, parnok madak alartem yimsu sua aliba, iba alar tia nungi parnok kümzüka ta sarasadem. "O Kibuba kechiba nai teti asoshi onok amaadoker, kechiba papigati nai onok sentoka-adoker. Nai onok tanaben ne dangi meyipa arudakjang", "O Kibuba aser onoki ne dangi meyiptsü". "Alemlia ama ozü anogo tasen kümdakjangma" (Aiatai-5:20-22). Aotsür Aor senso tajungtem, arung asenoki asenok temenen bushia nangzüker. Asenoki dang asen temenen nangzükra aser temulung meyipra, Tsüngremi Israel kin dang aochiba ama asenok dang aochitsü aser asenok dang tai atoktsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Church of England-i kasa o kasa kibong akümertem moatsütsü



February 6-9, 2023 anogotem nung London nung Church of England General Synod alidang tangokba noksa nung angur.

February 11, 2023: Church of England-i kasa tetsür o tetsür na mesüra tebur o tebur na kiyimba nokdang, ajisüaka parnok ama kasa tetsür-tebur kibong akümertem moatsütsü atema putirtem nem temelaba agütsüogo.

February 9, 2023 nü Church of England General Synod-i, tetsür o tetsür na mesüra tebur o tebur na kibong akümba sülen parnoki tenüngsang agütsütsü aser Tsüngrem dang temoatsü meshitsü atema Tenla kidangi arutsü melatsü asoshi telemtetba agiogo.

Church of England General Synod nung anogo ananü tashi iba onük nung o lemtepa aruba sülen tesüsa iba telemtetba agi.

February 6 nungi February 9 tashi General Synod nung iba onük nung o lemtepa sülen Canterbury nung tongti putir, Justin Welby aser York nung tongti putir, Stephen Cottrell nati, "Tang mezüng Church of England-i yimjak nung kasa o kasa kibong akümertem Tenla kidang pelaa agizüktü atema Synod-i telemtetba agiogo," ta metetdaksü.

February ita tetenzüklen Church of England-i, Arogoi

tetsür o tetsür na mesüra tebur o tebur na kibong akümba memelatsü saka parnok ama nem temoatsü meshia sarasademtsütsü akok, aser iba ya Marriage (Same Sex Couples) Act 2013 kübok tim lir, ta metetdakja liasü.

Tamalen Justin Welby-i Parliament züngsemtem dang, Church of England tenüng dang nungibo Arogo telongjem tongtibangba, ta metetdakja liasü.

November 9 nü General Synod nung bishops 36, clergy 111 aser laity 103-i Church of England-i kasa kibong akümertem moatsütsü pusema vote agüja liasü aser ibaji anema vote agütsür bishops 4, clergy 85 aser laity 92 dang liasü.

Arogo lenir 10-ibo vote agütsütepba nungji shilem magi.

Church of England-i Laishiba tetuyuba nung tetsür ka aser tebur ka na tsüngda kiyimba tangatetba nung maneni nokdaksü, ajisüaka kasa tetsür o tetsür/tebur o tebur (gay) kibong kümer alirtem moatsütsü temepishiba agütsüba sülen agizükogo, anungji putirtemi kasa tetsür o tetsür na mesüra tebur o tebur

na kibong kümer alirtem meshitettsütsü aser Tsüngrem dang nungi temoatsü meshia sarasademtsütsü, iba denji külemi Arogo züngsemtem dang parnok ama apuanitemji Tenla kidang pelaa agizüktü ajungshir.

Church of England nung Evangelical Khristantemiba iba telemtetba atema tebilemetsü kaa, "Church of England-i kasa kiyimertem moatsüba ajanga oda-odabo temeshi kiyimba tsütsü Arogo tangatetba melenshitsüa akok," ta metetdaksüogo.

January ita tomnen Religion Media Centre-i ayongzükba o toktepba sentong nung jembidang Church of England Evangelical Council (CEEC) Working Group nung züngsem, Helen Lamb-i, "Church of England-i benokba temepishiba yabo tera tali-tabong lir. Külenbo CofE-i, kiyimba ya tetsür ka aser tebur ka na tsüngda dang, aser ibaji Arogo tangatetba ta ashir, ajisüaka külenbo parnoki kasa kiyimertem moatsütsü atema jembir. Anapronglaji kodanga külemi aotsü makok," ta metetdakja liasü.

Pakistan kübok Khanewal nung alu nung aayanger Khristan ka zükset

Lahore, February 11 (Agencies): Hombarnü (February 6, 2023) Pakistan nung Muslim nung ali kibur kati alu nung aayanger Khristan ka züksetogo.

Aayanger Khristan ka jagi Muslim nungba'er alu nungi naring auya, ta tai tonglokja zükset, ta par kinüngertemi metetdaksü.

Taoba ita nunga Pakistan nung Khristan kati par alu nung Muslim nungertemi süngjang auyaba nokdangtsü merangba mapang nung pa khaseta liasü.

Pakistan nung Punjab Province kübok Khanewal District nung ali kibur, Rana Muhammad Waseem den Muslim nung pongui arrshi küm 48 Khristan, Emmanuel Masih zükset, ta Emmanuel'er

kinünger, Zahid Sahotra-i metetdaksü.

"Kübu tanubo mazüngi mapa inyaka aliba mapang nung Waseem den tangar ishika arua pai naring auyaogo, ta tai tonglokja liasü. Paibo pai aibelena mali ta ashi, ajisüaka parnoki taochi makai pa dak mejungi azükba ajanga pa asü," ta Sahotra-i osangbener nem metetdaksü.

Emmanuel-i pa kinüngtsü den tanur trok toktsür süogo, ta Sahotra-i ashi.

"Ozü yimdak Khristan kibong 35 lir aser onok ajak sensaker kibongtem dang aser Muslim nung lu nung aayangertem dang lir. Onok kanga sensaker aser onoki Muslim nung mejashidaksütsüsa alir," ta pai

metetdaksü.

Police-i Waseem den tangar ana puogo, ajisüaka onoki court nung ochi temeden angutsüji kanga tasak asütsü, ta pai ashi.

"Onok ket nung lawyer nem sen tagütsütsü mali. Nisung tepsetertemji tashi tulu aliba nisungtem lir, anungji bushisüngdangba sülen parnok bail nung melamela chioktsü," ta pai ashi.

Iba dak sendakba nung pai Arogo lenirtem aser Khristan temeden atema inyaker telok balala dang par kibong yariang, ta mepishi.

Tang alima nung Khristantem atema linük tamajungtiba 50 rongnung Pakistan ya jenjang 7buba nung lir (Open Doors' 2023 World Watch List).

ANOGO ABEN TSÜNGREM DEN

BILEMTETTSÜ TASHI

"Saka Teyarir, paji Tanela Temeshi, shiba tebui ki nung nung yoktsi, pai nenok dang ashiba ajak bilemtetdaksütsü"

- Yohan 14:26

Steven Wiltshire dang ya nisung taküm Camera (the human camera) ta ajar. Kechiba ta süra, pa tenük agi anguba ajak, tila kata mezütoki, noksa nung yanglutsü pai akok.

Tatishitsü agi, khen mapang ka Steven ya Rome yimti sema senzü aser pa dang iba yimti tiyongji paper ka nung noksa yangludangang ta asüngdang. Tebangkatsüka, pai lenmang jaka, ki, kijiba, Oda tila teri ajak tejangja nung yanglutet.

Steven Wiltshire den medemdanga ano kodang asenoki Lai nungji reprangdangdir, tesüngmangtsü tebilemtettsü shisatsü agütsüba indang ka shia angur. Ibaji Yisui Pa kotaki matudang nütsüngtem dang Tanela Temeshi parnok dangi yoktsü aser ibaji ajanga tebui nenok dang kechisa ashi item ajakji bilemtetdaksütsü ta shia lir (Yohan 14:26).

Youth Director kati kodak indang sayutsüngiba sülen lendong nung asü



February 10, 2023: Taoba hopta Arogo ka nung youth director kati kodak indang sayutsüngiba sülen ghonda ishika tsüngda gari tsüktepba lendong ka nung süogo.

Brihostibarnü Missouri nung aliba First Baptist Church North Kansas City nung Youth Director arrshi küm 30, Caylee Dugger gari asem tsüktepba lendong nung asü saka tanga gari ana anirtemjibo iba lendong nungjagi kümzük, ta Oklahoma Highway Patrol-i metetdaksü.

La ya Midwestern Seminary nunga zünga liasü aser taküm Master of Theological Studies in missions degree angutsü liasü.

Amongnü sayutsüngiba mapang nung kasa Arogo nung Pastor, Mike Parrett-i Dugger asüba indang lemsatep aser Jungkai Adok 7:9-17 nung ajemdaker lai kodak

tenangzükba indang sayutsüngiba liasü, ta metetdaksü.

"Dugger-i atangji Kibur Yisui Khrista tejangja meteta liasü aser teimla liasü. Brihostibarnep tesüsa lai yangi sayutsüngiogo," ta pastor Parrett-i ashi.

Pastor-isa, "Tang Caylee Kibuba den külemi lir. Kibuba la den lir aser la Kibuba den lir, aser lai Pa külemer," ta ashi.

Arogoisa Dugger-i lai mejema atenba "Hands" ken video ka lemsatepogo.

Lai mejemba ken nung kenjangji, "Tensa mapang tamajungdang asenoki tamang akatsüla, asenok Tsüngrem ket nung lira asenok kümzüka lir, aser asenok timtemba ya amajok masü."

Tan hopta tetenzüklen Dugger'er kibong atema GoFundMe ka tenzükogo aser tang tashi nung dollar sen 24,000 bendentetog

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Oshipuin

(n) oshioben balalaren asadanga bushiba (research on language)

* Tanü putu nung lanurtem aikati oshipuin mapa nung jangrar.

Osolok

(adj) o moloka mesüra talila enoka jembiba (exaggerate)

* Osolok jembir nem asenok aiben anisadaksür.

OLONG PAITEP # 6426

Grid for OLONG PAITEP # 6426 with numbers 1-24 in a 5x5 layout.

TIPIEN

- 1. Saku - (4)
6. Songjen - (7)
7. Mali/Tazung - (4)
9. Tasen apok - (6)
11. Songtem - (3)
13. Ata liasü - (5)
16. Tzunglu den külemi tsüker - (3)
17. Aso tila - (6)
20. Tashi maküm - (4)
24. Tenung kasa jatepba - (7)
25. Ki yangluba oset - (4)

LANGTSÜNGLEN

- 1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anungdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. ... tatsü - (3)
12. Tebur kidong aser zunga kasa tsungda jatepba - (4)
14. Pela agizükba tapu ka - (5)
15. Tenung atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 6426 TELANGZÜBA

TIPIEN :

- 1. Apet, 3. Temeim, 6. Saklok,
9. Adam, 11. Anük, 12. Lendong
13. Aman, 14. Aika, 17. Ngashi,
19. Asükwa, 20. Wain.

LANGTSÜNGLEN :

- 2. Pua, 3. Teki, 4. Mit, 5. Molok,
7. Lamem, 8. Angi, 10. Alak,
11. Anasa, 13. Atala, 15. Onsa,
16. Aak, 18. Hai.



SARASADEM AJAKBO TSÜNGREM TSÜNGDANG SENTI MASÜ

- Kodak : Gabriel, Na kong lir?
Gabriel : Oba, ni yangi Na anasa lir!
Kodak : Luagi alima nung tamanger telok ana ji kechi atema yamai sashia lumia sarasademmer, lua reprangdangang?
Gabriel : Oba, parnok election agir, constituency ka nung seat ka agi rakteper. Telok anaprongla jagi pei pei telok tanishir nem takok agüjang ta ne dang kangzüksü onük bendena sarasademteptar.
Kodak : Tanishir anapronglaji ni meshim nung koda!
Gabriel : Oba, süra koda asütsü?
Kodak : Alimaji nisungi melungba nung masü, Ni melungba nung aotsü.

Lilir: Talitemjen Imchen

Tanur asoba anogo nung salem osang den noksa angati adokdaksünura - Tenung, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenung :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Congress aser Left Front nem vote teinoktsü: PM Modi

Agartala, February 11, 2023

(Agencies): Congress aser Left Front nem vote enoktsüba ajanga Tripura nung terenlok mali akümtsü kechiyong telok anaprongi terenlok mapa kecha meinyak ta Prime Minister Narendra Modi-i ashi.

PM Modi-i February 11, 2023 nü Tripura semdang aser BJP atema nüboyimtsü. Dhalai district kübok Ambassa nung pai lokti sentong ka nung o jembi.

"Congress aser Left teloktemi sensakertem ashioktsütsü dang meteta lir. Parnoki sensakertem indang khuret magientettsü. BJP-ibo anüngdang aser aonung nenok khuret ajak agientsütsü atema kilir ka ama inyaker" ta pai ashi.

Congress aser Left front

ajanga terenlok nung Tripura tsünglangleni ludaksü saka BJP sorkari küm pungu nung dang Tripura tejakleni anir aruogo, ta PM Modi-i ashi.

"Tripura nung yimtsüng shia nung optical fiber enoker. Tesüiba küm 8 tsüngda Tripura, the installation of optical fiber nung optical fiber asemben agi teimba enokogo. Tripura ya South Asia indang 'Gateway' asütsü. BJP indang bangzüng ajanga onoki nübortem taginüba atema inyaksüba lir. Onoki iba bangzüng atema wadang tasentem inyaker" ta paisa ashi.

Tripura nung Left züngsemtemi dang sorkar schemes angu saka tangbo senso shiai sorkar schemes indang tajangzüktem angur, ta paisa shisem.

"CPIM züngsemtemi police station tem atsüngbanga liasü saka BJP sorkari temzüng-ozüng shitak bener aruogo. Tripura nung ozüng alema inyaksangshiba mali kümogo. Tesüiba nung Tripura nung party ka indang wako dang songdaksü saka tanübo BJP sorkari Tripura nung tetsüba aser ozüng alema inyaksangshiba agienogo" ta Modi-i metetdaksü.

Left aser Congress sendaktepba ya nisungtem ashioktsütsü atema lir, parnoki sorkar ketdangsubaren timi masür aser iba jagi sendakteper. Parnok nem vote enoktsüba ajanga Tripura tesüleni alutsü anungji lotus indang button nung vote enokjang" ta PM Modi-isa ayongzük.

Congress manifesto nung 'Five Star Meghalaya' nangzük

Shillong, February 11, 2023

(Agencies): Taoba union minister aser All India Congress Committee (AICC) lennir Jairam Ramesh-i February 11, 2023 nü Meghalaya Assembly election atema Congress manifesto sayaogo.

Congress manifesto nung parnok nem sorkar akümtsü maongka agütsür "Five Star Meghalaya" akümtsü atema "Five Commitments" nangzük lir.

BJP-i Meghalaya sobaliba aser maitsü amokmerener. MDA nung yariteperitem ya puppets lir, ta Jairam Ramesh-i ashi.

Congress-i Meghalaya nung Free Health Care Scheme kübok senso ajak nem 'free health care' agütsütsü nangzükogo.

Parnokisa Meghalaya nung tetsür shia Kindergarten nung class 12 tashi free education agütsütsü nangzük lir.

Congress-i aluyimer ajungkettsü atema Ginger, Turmeric, Broomstick, Black Pepper aser tanga tsünüsönbongtsü atema Minimum Support Price (MSP) sangdongtsü nangzükogo.

Parnokisa BPL kilen shia nem kilem atongtsü atema teyari agütsütsü aser tamangba yimsü sentongtem alitsü kiojen yanglutsü atema Rs 500 corpus fund agütsütsü ta nangzük lir. Ano BPL kibong shia nem ita shia 200 units free power agütsütsü.

Congress-i State University balaka amenoktsü aser IOT (Internet of Things), Block

Chain Technology, IT o ITES amala course tem agütsü.

Congress-i BPL kibong shia nem küm nung pezüben tashi LPG cylinder angati agütsütsü aser Meghalaya nung mass entrepreneurship ajungketa kibong shia nem mapa kaka agütsütsü ta manifesto nung shia lir.

Congress-i accredited journalist ajak atema pension scheme aser tanga teyaritem agütsütsü aser tesayurtem akhümtsübu itasen mapang shitak nung agütsütsü ta nangzükogo.

Congress-isa Meghalaya nung tetsürtem asoshi shishilembadak balaka lapoktsü aser iba nung "Proudly Made in Meghalaya" tag amshia ayoktsü.

Manipur nung mozü shibelener tetsür 3 apu

Imphal, February 11, 2023

(Agencies): Manipur-Myanmar arrtsülen ozü shibelener tetsür ka ket nung Rs 10 crore alang brown sugar seret 5.115 puogo.

Arrtsü adena orr aliba tesem nungi sen aika alang mozü bener aruba osang ka angazükba sülen mita ao, ta Churachandpur district Superintendent of Police Shrivnanand Surve-i ashi.

Manipur kübok Sugnu-Churachandpur road ajanga mozü bener aruba osang metet aser iba jagi sepaitemi mita ata. Idangji Vahhoihlhing Baite (41) apu aser la indang gari nung

mozü aika bena aliba angu, ta pai ashi.

La indang gari nung saponng pondang 440 nung brown sugar seret 5.115 bena liasü aser ibaji international market nung Rs 10 crore alang liasü, ta Shrivnanand Surve-i metetdaksü.

Külen, Imphal International Airport nung Special Cargo Task Force ajanga ganja aika apu.

Tayimtsü anendak baggage screening mapang cannabis gram 800 bena aliba putet. Iba ya New Delhi-i bener aotsüba liasü aser iba dak sendakba

nung tetsür ka apu.

La dang asüngdangya asüadang la teyii la nem ganja agütsü aser Indigo tayimtsü ajanga bener aotsüba liasü ta nangzük.

Iba sülen tetsür teyii Singjamei police station nung la sasa arua bendanga agütsü. Adianu ana ya Imphal East district kübok Khurai nung alir aser Chief Judicial Magistrate, Imphal West tsüngdangi anir ao. Okadaki tena February 14 tashi tepuokdak ayutsü temelaba agütsüogo.

Congress aser Left Front nem vote teinoktsü: PM Modi



Manipur police aser Assam Rifles külem telok kati Kangleipak Communist Party (Military Council Unification) züngsem ka apuba sülen agiba noksa angur. Imphal west district kübok Pheidinga nung telungpur apu aser pa ket nung pistol ka den injang 6 bena liasü.



Turkey aser Syria nung menoknok tesashi anakba sülen teküzmükertemi maparen balala benoka inyaksangshiba mapang nüburtem süia aoba noksa nung ngur. Kasa mapang nung India nunger nisung ka tenüng agi Vijay Kumar tasü mang Honibarnü Malatya nung hotel ka ajareper aliba nungi ngutetogo.

Spain-i Nicaragua nunger political prisoner tem nem lispour jenjang agütsütsü

Barcelona, Tsüklai/February 11 (Agencies): Iba hopta tetenüklen chiokba Nicaragua nunger political prisoner tem nem lisopur jenjang agütsü atema Spain-i maongka agütsüogo. Tir Daniel Ortega den sendaktepa aliba legislator temi parnok ket nungi lisopur jenjang agütsü atema jenjang agiba sülen iba maongka agüja liasü.

Nicaragua-i political prisoner 222 chioka United States-i yokba sülen anogo ka lir Spain foreign minister Jose Manuel Albares-i, iba telemteba agiba ya Hokolbarnü news outlet Servimedia nem metetdakja liasü.

Tepuokertem rongnung taoba mapang yimden yimsüsürtem, osangbenertem, tamangba yimsü lenirtem densema lir, shirnoki Ortega anema jembia liasü. Ortega-i pa anemertem ajema ajema kümdaktsütsü atema azütokshi inyakyim benokba atema human-rights teloktemi pa aitsüogo.

Brehostibarnü sangdong ka ajanga US Secretary of State Antony Blinken-i tepuokertem chiokba pelashishia agizükogo aser Nicaragua nung meimchir temeden anema inyakba azüoktsü atema iba ya jenjang tapet ka ta ashiba den America-i inyakyim shitak benoka inyaksangshiba ajanga iba ya atalokogo, ta ashi.

Kasa mapang nung

Nicaragua nungi ozüng raksartem agütsü atema tepuokertem chiokogo, ta Ortega administration-i ashi. Television nung sangdongba osang ka ajanga Ortega-i, item tepuokertem ya bendanger tashi balala atema inyaksagshirtem ta shia "parnok atema inyakertem agidakjang," ta ashi.

2018 küm April ita nungi tenzüka sorkar anema inyakertem azüoktsü atema Ortega-i anir inyaksangshia arudar.

Nicaragua-i aniba ozüng yanglurtemi parnok chiokba tepuokertem ket nungi lisopur jenjang agütsü atema telemteba agiba ajanga item tepuoker 222 ya linük ka makai akümsü ta critic temi tsübua bilemer. Ajisüaka iba telemteba ya agizüktsü atema temzüng ozüng nung temelenshi bener arutsüsa akümsü aser lisopur ken o dak sendakba nung tanabuba vote ya 2024 matong tsüngda agütsübo mimlar.

Tepuokertem linük makai kümdaktsütsü asoshi jenjang agi tenzükogo ta osang sangdongba sülen Albares-i osangbenertem dang ashiba agi, Spain sorkari taoba mapang tepuokertem nem lispour jenjang agütsütsü atema telemteba agiogo.

Item tepuokertem temporary humanitarian visas bener US-i aitsü temelaba agütsüogo. Spain nunger ketdangsürtemi ashiba agi, lisopur jenjang atema apply

asütsü asoshi jaoktsü atema parnoki tepuokertem den tongteprateptsü.

Tepuokertem ana Brehostibarnü chiok, saka tenati tayimtsü nung mener US-i aotsü atema memulungi liasü. Tena rongnung ka Catholic Bishop Rolando Álvarez liasü, shiba taruba hopta linük anema inyaksangshiba aser osang tai prokshiba atema obendangtsü liasü.

Ajisüaka pa anema benoka aliba ken o ya tepuokertem chiokba sülen Hokolbarnü-i belener ao. Managua appeals court ka nung chief magistrate Octavio Ernesto Rothschild-i Álvarez küm 26 tepuokdak ayutsü obendang agütsü, koba Ortega lenisüba kübok tawa opposition lenir ka tepuokdak ayutsü atema küm talangtiba temerenshi agütsüba liasü.

Okadak ajangsa Álvarez dang sencha achitsü aser pa ket nungi Nicaraguan lisopur jenjang agütsü ta sangdonga liasü.

Álvarez ya Ortega aitsürtem rongnung tongtibang ka liasü aser pa August apu. Pai külem bishop tem den mangatettepibo linük toktsür moner ta shia Brehostibarnü linük toktsür aotsü memulungi liasü, koba Ortega-i tamagitsü ta shiogo.

Pa Modelo tepuokdak yua lir. Iba tepuokdak ya tepuokertem rishikangshia amshir ta shia Amnesty International-i aitsüogo.

SANGDONGER

Ozü 26th Aonglenden Assembly Constituency NDPP Parent Body Active aser Primary membership nungi anener aser tang election nung tokteptsü aliba taoba MLA Wb. Toshipokba Longkumer yaritsü lemteter.

- 1. Lulenmayang – Vice President,
- 2. Samanungsang – Joint Secy.
- 3. Putisusang – Joint Secy.
- 4. Kikanungba – Joint Secy.

Taküm July ita tashi nung Finland, Sweden NATO nung züngoktsü; Finnish tir

Helsinki, Tsüklai/February 11 (Agencies): Finland tiri Honibarnü sangdongba interview ka nung, Finland aser Sweden na taküm küm July ita tashi nungbo NATO nung züngoksemsü imlar ta ashiba den linük ana ya agizüktsü atema United States-i Turkey nongshidaktsünüba lemsatepa liasü.

Iba ken o ya talangka atsülanga ora, iba military alliance-i züngsem tasen aniokba inyakyim nung tashishitsü adoktsü, ta tir Sauli Niinistö-i Finnish news agency STT den sensaksemba mapang ashi.

"Vilnius nung senden amenba mapang iba ya matalokra kechiba iba sülen inyaksangshitsü," ta Niinistö-i ashi.

Lithuania nung NATO senden July 11 aser 12 nü ayongzüka amentsü sentong yanglua lir.

NATO nung züngoksemsü atema tang aliba züngsemtem ajaki mulunga agizüktsü nüngdaker. Linük 30 agi kümtetba iba lokti tentet nung Turkey aser Hungary nati dang Sweden aser Finland na züngoksemsü atema memulungi lir.

Hungary-i February ita temelaba agütsütsü nangzükogo, ajisüaka Turkey-i tang tashi

linük ana züngoksemsü atema temelaba agütsütsü tebelimba aliba lemsatepa mali. Niinistö-i ashiba agi, Turkey-i telemteba ka agütsü atema Turkey tir Recep Tayyip Erdogan dak keta lir.

"Nüburtemi pa nongshiba agi pa manokshitsü. Ajisüaka Turkey aser United States na sensaksemba mapang onük kar danga benoka sensaksemra agi agi lenmang lapoktsü akok," ta Niinistö-i ashi.

Kuli aika aliba ajanga Sweden aser Finland na NATO nung züngoksemsü atema Turkey-i temelaba magütsü arudar. Kulitem rongnung tawa Stockholm nung longkak aitertemi Turkish Embassy kima Quran rongtoktsüba aser Erdogan indang effigy ka süngzü agi alener amshiba densema lir.

January ita Ankara-i, Nordic linük ana ya NATO nung züngoksemsü atema Brussels nung senden amentsü aliba mapa telatet ka makai thinentü.

Niinistö-i ashiba agi, Finland aser Sweden nati taoba küm iba telok nung züngoksemsü atema tetsükdaktsü kecha malitsü ta NATO-i ashiba aiben angashiogo. Iba linük ana yagi May ita NATO nung adentsü tebilemba aliba lemsatepa liasü.

Pak Court-i EC dang Punjab Assembly election anogo sangdongtsü tuyu

Islamabad, Tsüklai/February 11 (Agencies): Pakistan nung court kati Election Commission of Pakistan dang Punjab provincial assembly election atema anogo tangsa tang sangdongtsü tetuyuba agütsüogo, koba PML(N)-i aniba sorkar atema tamakok aser Pakistan Tehreek-i-Insaf tekolakba Imran Khan atema takok ka ama reprangteter.

Hokolbar aonung menor Lahore High Court, Justice Jawad Hassan indang single bench-i assembly atongsaba sülen Election Commission-i anogo 90 tsüngda election agütsü nüngdaker aser election agütsü atema anogo sangdongtsüla ta shia iba tetuyuba agütsü.

Imran Khan-i aniba Pakistan Tehreek-i-Insaf party-i okadak ken o benokba sülen iba tetuyuba agütsüogo.

Punjab aser Kyber Pakhtunkhwa provinces nung Pakistan Tehreek-i-Insaf-i kümtetba sorkar ya anogo 20 tejakdang atongsago, koba general election takaratiba nung agütsü atema Centre sorkar

nongshitsü atema liasü.

PML(N) aser parnok den sendaktepa aliba party temi Pakistan Tehreek-i-Insaf-i National Assembly loksa-a election agishitsü akhangba ataloktsütsü melena provincial assembly ana indang election ya August ita federal sorkar tenure tembangba sülen agütsü sangdonga liasü.

Iba sülen Punjab aser Khyber Pakhtunkhwa nung election agütsü atema anogo sangdongtsü province anaprongla indang Angh-i memulungi liasü.

Iba ken o ya Election Commission of Pakistan dangi aben aser EC-i ashiba agi, province anaprongla nungi police chiefs aser chief secretary temi linük rongsenketzüng aser security jenjang majungba ajanga election agütsü atema tang tapet masü ta osang agütsüogo.

Iba sülen Imran Khan-i par party dang sorkar tasa anema Lahore High Court aser Peshawar High Court naprongla nung ken o benoktsü tetuyuba agüja liasü.



Pakistan anütoklen Honibarnü nüburtemi Nankana Sahib Police station maka Tsüngrem anema inyaksangshir ka police-i pua yua aliba anizüka tepsetogo, ta police temi metetdaktsü.

